

# «Co fissi sch'jau cumenzass anc ina giada?»

In plevant pensiunà s'engascha per il rumantsch e cumenza anc ina giada a studegiar il rom da sia professiun

DA CLAUDIA CADRUVI / ANR

■ **Dapi in onn è Cristian Kober pensiunà. El ha danovamain cumenzà a studegiar teologia ed el ha pliras ideas co ch'ins pudess activar l'Uniun dals Rumantschs da la Bassa. A l'anr ha el raquintà da sia vita.**

*Cristian Kober* è creschì si cun blers uffants. En sasez ha el be duas soras ed in frar. Ma ses geniturs han manà ina chasa d'uffants. Il bab era architect e derivava da la Germania, la mamma era tgirunza. Durant la segunda guerra mundiala n'aveva il bab nagina lavur. In temp è el ì a schurnada tar purs fin che sia dunna ha gì l'idea d'avrir ina chasa per uffants cun asma.

Fin 22 uffants prendivan ils Kobers si. Igl era in grond manaschi cun ina cuschinunza e dunnas d'uffants, tranter quels era uffants gidieus. Suentar la guerra ha il bab puspè gì lavur. La chasa d'uffants han ils Kobers tuttina tegnì.


## Dissegnader da maschinas e teologia

«Puntraschignot» discurreva sia famiglia. Kober sa regorda bain ch'ins pudeva da quel temp anc eruir exact da tge vischnanca ch'insatgi vegniva – be entras la pronunzia dals plects «paun» u «jau». Cristian è ì a scola rumantscha. Da quel temp existiva ina scola tudestga ed ina rumantscha a Puntraschigna. La tudestga era per ils uffants dals impiegads talians e tudestgs.

«Jau er plitgusch in dal sport che dal banc.» Perquai n'ha Kober betg finì la scola media a Samedan ed è ì a Turitg a far in emprendissadi sco dissegnader da maschinas. Durant l'emprendissadi è dentant creschì il gust da studegiar. El ha pia prendì suenter la matura ed è sa mess en a studegiar teologia. Il plaschair per la religiun ha Kober forsa ertà da sia mamma. Lezza appartegniva ad ina grupp politica «religiun sociala» plitost sanestra. Il bab era in liberal.

## Plevant en Surselva ed en l'Engiadin'ota

Sco student aveva Kober la finamira



**Dapi in onn è Cristian Kober pensiunà. El va novas vias: ina rumantscha ed ina teologia.**

FOTOS C. CADRUVI

da muventar insatge. La baselgia era en ses eglis ina instituziun steria ed antiquada. Il 1966 ha el surpiglià sia emprima plaiv, quella da Valendau e da Sagogn. Suentar sis onns è el ì cun sia famiglia giuvna en l'Engiadin'ota nua ch'el è daventà plevant a Silvaplana, Champfer e Segl.

Ils cults divins rumantschs n'avevan betg quest caracter quadrà sco quels da las baselgias tudestgas. Kober sa regor-

da cunzunt gugent da las chanzuns, p. ex. dals chorals rumantschs ch'il chor chantava en la baselgia refurmada a Sagogn: «Els chantavan schnuai vel bellas chanzuns.»

Kober ha gia baud cumenzà a chantar gospels «rumantschs» cun ils uffants. Quai na haja dà nagina critica. La glied saja stada cuntenta ch'i vegnia fatg insatge per tegnair ils uffants en baselgia.

## Era il figl daventa plevant

El haja adina gì ina chasa averta, era per la glied da l'ur da la societad. «Jau era in um da la porta averta», di el. Para che questa vita ha laschè enavos ina impressiun positiva tar ils uffants da Kober. Ses figl ha numnadamain era elegì la clamada dal bab ed è oz plevant a Rüeggisberg BE.

Il cumbar per las renovaziuns en la baseglia è stà dir. Ma Kober ed auters plevants da sia generaziun han cuntanschì intginas finamiras en la sinoda grischuna, p. ex. l'introducziun dal dretg da votar per ils esters e per ils giuvens da 16 onns.

«Nus communitgain als giuvens ch'els sajan maiorens cun la confirmaziun. Perquai na dastga la baselgia betg privar la giuventetgna dal dretg da vuschar», declera Kober.

## Plevant per ils praschuniers

Il 1984 hai dà ina gronda midada en la vita da la famiglia. Il reverenda ha surpiglià in post en la plaiv da Hinwil. Per quest pass numna el dus motifs: D'ina vart han ils uffants cumenzà ils studis en la Bassa.

Uschia haja la famiglia anc pudì restar ensemen. Da l'autra vart haja el era tschertgà ina nova sfida ed ina plaiv nua ch'el possia lavurar cun in auter plevant.

A Hinwil è Kober s'occupà da la

tgira en la praschun. Perquai haja el fatg ina scolaziun da terapia da discurs. Questa scolaziun haja el era durvè pli tard en la piazza a Männedorf. Là saja el s'occupà dals pazients en il spital.

## Frestgamain en la pensiun

Dapi in onn è Kober uss pensiunà. Per questa fasa da vita vul el midar «professiun». El less s'engaschar per il rumantsch. Avant intgins mais ha l'Uniun dals Rumantschs da la Bassa elegì el en suprastanza. El ha bleras ideas co ch'ins pudess activar l'uniun.

In'otra lavur ch'occupescha el per il mument è la renovaziun da la chasa materna a Puntraschigna. I sa tracta d'ina chasa dal 16avel tschientaner. Da preschent vegn gist fatg la fatschada e Kober sto savens ir en il Grischun.

Lura ha il plevant pensiunà danovamain sa mess en a studegiar teologia. El sa dumonda: «Co fissi oz, sch'jau cumenzass anc ina giada?»

E co èsi? «Ils accents fissan tut en in auter lieu», respunda Kober. «Per nus era il lieu da la cretta cristiana la baselgia. Ma oz sun jau da l'avis ch'il lieu da la cretta cristiana sa chatta en il mintgadi. La magiur part da la motivaziun cristiana è ordaifer la baselgia en impegns ecologics, politics e socials.»

## Curt e bun

*Num:* Cristian Kober  
*Naschì:* ils 30 d'october 1937  
*Creschì si:* a Puntraschigna  
*Domicil:* Stäfa  
*Stadi civil:* maridà  
*Uffants:* duas filias, in figl  
*Professiun:* reverenda  
*Autor rumantsch preferì:* Artur Caflisch  
*Auters auturs:* Wolfgang Hildesheimer, Edzart Schaper  
*Musica:* Johann Sebastian Bach  
*Lieu preferì:* Alp Languard  
*Spaisa:* gnirom e pulenta  
*Bavronda:* Grumello

